

---

# 香銷二十美人樓

---

置

---

當劇者：  
：

劇中人：  
：

場次：  
：

號七拾街林茂地麻油龍九←址地

抄  
印

代仔波

---

劇中人  
李海燕  
賈小燕  
賈彥齡  
衛鼎儀  
衛小儀  
賈季蘭  
李建封  
衛宋樂  
元太祖  
娟娟  
起鳳  
老夫人

(第一場) (奇石山海隅舵樓景)

說明：衣什邊石岩，什邊石岩上豎有無數「金」字小旗，正面大海波浪滔滔，衣邊石樓中有舵樓，有大魚網伸出海內

(李建封在舵樓上坐幕)

(開邊開幕) (燈色黯淡，天將微雨) (譜子)

(建封食住寶子落台口撫鬚長嘆一才詩白) 可憐宋帝已逃亡。金兵昨夜陷長安。滔滔江水千層浪。不堪

回首故宮牆。(花上句) 可憐我呢個憂國賢臣，今日臨涯結網。一自海陵遭劫後，唯有避世佯狂。

寧願在此終老殘年，更未堪把前程念想。(解酒壺飲兩啖介白) 唔怪得話長安後浪推前浪，劫後不

堪話興亡(介) 我原本係宋朝一個守陵官，自從金兵一到，風捲殘雲，先帝嘅陵墓亦比佢掘開，

我一家人亦比佢殺死，甚至乎我最愛錫個粒女(一才) 亦難倖免(喊介) 而家我共衛宋樂慝埋响

呢度，好彩嘅就打到兩條鮮魚食吓，唔好彩嘅就餓三五七日，都話唔定叻(介向衣邊岩口) 喂，

衛樂師，唔好成日睏叻，出呢幫吓手，煲定煲滾水，預備一陣浸魚食都好吖

(衛宋樂食住叫聲背琵琶卸上介)

(建封白) 呢啦，透着個火盆，咪成日睏

(宋樂透火一才望什邊口古) 建叔，點解個便山頂插有金兵嘅旗號呢，咁我地慳响呢處都唔係幾安穩，幾妥當。之噃

(建封口古) 梗有嘅叻，呢處係海口來往商船必經之地，金撻子有乜唔加意提防。。吖

(宋樂口古) 建叔呢處咁危險，我都唔想响度叻，我想回返揚州避過此驚濤險浪。

(建封口古) 今晚食先海鮮，聽朝至扯啦，做人要樂天知命，唔駛咁失慌。。嘅(二人透火煲水介)

(排子)(有小船一隻由什邊上介)

(宋樂白) 衣，建叔，個隻係乜野船呢呀

(建封一望白) 咪咁大驚小怪啦，個隻係我地宋人商船呢，你唔睇見船頭有枝旗仔寫住個宋字咩，咪理咁

多叻，透火啦

(搗鼓，天陰閃電，什邊放無數火箭，焚船，火光熊熊，船沉介)

(建封慘叫白) 唉，冇陰功咯(乙反木魚) 臨崖一望，血淚汪汪。哭聲如雷貫耳，夫喚其妻，子喚其娘。。

試問更有誰人，清算呢段可憐血賬。更未知誰個橫施火箭，得咁冇天裝。。我恨不能隻手翻天，

惟有退而結網。無希望。希望打得鮮魚三兩，佐酒入愁腸。。（白）樂師，幫手拉起個魚網，希望搵返餐食啦（上舵樓二龍爭珠寶子拉起網嘩然白）嘩，乜今日網魚份外重架，唔通有條十零廿斤嘅大龍躉（起網，網內有鮮魚跳躍，及有兩斗官相抱介）

（宋樂拈小網埋大網欲撈魚狂呼白）嘩，乜有兩個人仔呀（連隨抱起台口介）

（斗官喊介）

（建封食住大驚幾乎跌落水，沖下台口抱斗官一望介白）衣，呢兩粒野都算大難不死咯（口古）一個係男，一個係女，兩個同時死同時生，唔通兩兄妹同罹火網。

（宋樂一看介白）唔係呀建叔，呢個女嘅衫角綉住一個楊字，個男嘅戴住個香囊，綉住個黃字，又點會係兩兄妹呢，最奇怪嘅就係撈佢兩個上呢嘅時候，佢兩個重擁抱成雙。。

（建封一才仄才口古）唉吔，係咁呢兩粒野就來頭大叻，將來唔駛講都係佢娶佢，佢嫁佢，若果唔係前世有孽緣，佢兩個又點會同死同生好成咁樣。呢

（宋樂口古）建叔，唔好講咁多叻，不如將呢個仔交比我，個女就比過你，女就有緊要嘅，仔就需要教育，事關你蒼蒼白髮，難以養教兒郎。。

(建封點頭白) 都好，我死咗個女，有番個女都有咁傷心，我當呢個係我個女呢叻 (抱斗官錫介)

(宋樂白) 我都當呢個係我個仔呢啫 (抱斗官錫介)

(建封一才白) 不過咁啖樂師，將來你個仔一定要娶我個女嘅啫 (花下句) 事關佢兩個有前生冤孽，今生一定要結鸞凰。。十五年後相會海陵，好待有緣人終成儷伉。(白) 你記住叻，十五年後你記帶個仔呢海陵見我個女，呢重冤孽梗要了嘅，如果唔了就搞出好多事嘅叻

(宋樂花下句) 別離更恐無信物，待我琵琶解下送與呢個小姑娘。。他日縱有險浪驚濤，佢兩個亦當諧鴛帳。(白) 我而家抱呢個仔番杭州叻，我將我一生嘅衣鉢傳授比佢，你好好地湊個女啦 (交琵琶介) 呀，重有，我將呢個仔改名叫做波兒，你記住叻 (別下)

(建封錫斗官一輪白) 佢個仔改名波兒，我個女叫乜野呢，呀，不如叫做海燕啦 (介) 佢就抱個仔去杭州，咁我抱個女去邊度呢 (介) 有咗個女就不能漁家終老叻 (花下句) 不重生男重生女，我亦可以教曉佢銅琵琶鐵板將佢送落教坊。。(下介)

(落幕)

(第二場) (海陵十二美人樓新景)

說明：衣邊立體瓊樓，連底景由近至遠，壹共十二瓊樓，迴欄曲折，什邊石牌坊，上寫「十二美人樓」  
御筆，正面石枱椅，衣邊台口有紙筆墨，台口當為瓊樓之外苑，擺時花，衣邊有樹，結綵張燈，  
堂皇之極

……幕序二十年後……

(四砍女拈琵琶洞簫倚欄杆或坐平台坐幕)

(排子頭作上句開幕)(襯簫鼓之聲)

(鶯鶯上掃落葉介白杭)乜野叫做十二美人樓，此日坊經已靡爛，當日神宗皇，好曉嘆，賈似道，媚君顏，  
建築此樓台，窩藏美女盈千萬，挑選其中十二人，承歡不論朝和晚，一朝金鼓動地來，昔年艷跡  
今渙散，鳳去已樓空，無人再戀棧，直到前年改教坊，車馬盈門皆官宦，若問教坊歌女第一名，  
海燕音容誠可讚，彈得好琵琶，唱得好音範，望之極熱情，處落就極冷淡(慢板序)

(海燕抱琵琶上介慢板下句)血淚灑桃腮，愁雲遮粉黛，人說琵琶曲好，也不過是帶淚，而彈。夜夜夢  
裏銀河，卻不辨牛郎真相貌，既有孽債難忘，何不見歸來情雁。(白)一年兩年，不知不覺苦咗五

年叻，亞爹同我講，話二十年前得我於雁門海隅，個陣時重有一個同我咁大嘅嬰兒一齊逃生死裏，認為孽緣所註，我非他不嫁，他非我不娶（介）到今日我雖未見其人，唯是有靈犀一點，夢裏亦彷彿見當年情狀（介）亞爹話十五年後，佢同我相會於海陵，點解過咗五年都唔見呢呢（苦笑介）怕冇的咁事嘅，我個心唔□嘅啫（將琵琶放於衣邊石枱拈花微笑介）

（季蘭上介台口花下句）富貴榮華非所望，生平最愛是歌壇。小春鶯，混在曲苑詞林，誰識我自名門官宦。（白）好奇怪嘅，我也野都唔係幾喜歡，最喜歡就係彈吓唱吓，我唔比亞哥知架，我亞哥係海陵王，佢最憎呢亭，我就最中意呢亭（介）不過我好謙厚嘅，我時時都呢請教吓人架，呢，呢處最出名個個海燕姐就係我嘅□友良師叻（入介）海燕姐

（海燕口古）蝦，我都叫你唔好學野叻，你又試呢搵我，你要顧住吓身份至得，你貴為王族，唔應該整日在教坊遊覽。嘅

（季蘭口古）教坊好失禮咩，唔知點解我一日唔呢呢處，我個心就唔自然嘅叻，行又唔啱，企又唔啱，睏又唔啱。。

（海燕口古）亞蘭，雖然教坊唔係下流之地，但係你亞哥貴為王爵唔會歡喜你呢嘅，番去啦，十零歲女，



唔好咁脾氣硬。

(季蘭口古) 燕姐，我真係唔呢唔得嘅，我不只對於呢處教坊有留戀，對於你都有留戀，最好呢，我呢世日日夜夜對住你，唉，真係飯都可以食少兩餐。

(海燕掩口笑介白) 你都傻嘅(花下句) 若鍾情，莫向呢歌台楊柳，好應寄與一位曠世奇男。焉能長敝不分離，天下盛筵無不散。

(季蘭白) 有辦法嘅(花下句) 你是雲英未嫁，我亞哥亦是一個未娶痴男。倘能任我暗繫情絲，姑嫂情長，自可同歡早晚。

(海燕失笑白) 亞蘭，我又點會嫁比你亞哥呢，你都傻嘅，點配啫

(季蘭白) 配起上呢就啱嘅啦

(鳴鑼三吓又三吓，內場嘈什聲介)

(叻叻古)(建封滿頭大汗上拉住燕口古) 女，呢次我兩父女再有藏身之地叻，個便有個大官員從僕如雲，話要奉母命呢毀拆呢處十二美人樓嗎，咁我地豈不是破其大產。

(眾歌女驚慌交頭接耳介)

(季蘭口古) 邊一個大官員敢呢驚動到呢所十二美人樓吖，假如我呢個海陵王府嘅千金小姐肯拋頭露面，我相信都有人敢過份強橫。。。(拍心口介)

(海燕口古) 亞蘭，你唔好離開我呀，有你响處我個心雖然係慌啫，都有個人响旁邊做膽。(哀懇介)

(季蘭拍心口介白) 得叻得叻(口古) 任佢係乜野州官縣長，只要我拋佢兩句，佢唔斟茶認錯，我都唔放佢行。。。

(建封花下句) 小姑娘我寧願向你深深跪拜(介) 望你化作觀音菩薩救吓條殘。。原來你係王族千金，自

悔我一向識人無慧眼。(求懇介)

(季蘭沙塵介)

(鳴鑼介，內場嘈什介)

(兩手下擔大紅燈籠上寫「海陵王賈」，二壯丁拈皮鞭先上清道，手下堂旦先上介)

(大花)(彥齡上介台口花下句) 怕聽對樓吹鳳笛，琵琶猶厭隔牆彈。。我要香銷十二美人樓，絲竹官絃

成焦炭。(入介)

(海燕大驚連隨俯首擔石橈台口白) 坐啦大人

(眾歌女跪下介)

(彥齡一才火介喝白) 躡開(坐下)

(海燕驚攬蘭介)

(季蘭台口拋介白) 喂，你駛乜坐响度擰歪塊面呀，你梗係唔敢見我叻，你敢見我，我都要講的架勢比你

聽嘅叻，我係海陵王個二妹，董貴姬嘅姨甥，你奉咗邊個命令呢騷擾呢處

(彥齡重一才抬頭介)

(季蘭食住又喜又驚介白) 唉吔，乜原來係亞哥你呀(介)我亞哥呢架，你地唔駛怕呀

(彥齡一才火介白) 二妹，你為乜野事幹要呢到呢的地方，你好扯咯噃

(季蘭驚怯笑介口古) 亞哥，扯，我梗扯，不過在我臨扯之前介紹你認識一位國色天香，你就知道呢處頗

堪戀棧。

(彥齡火介口古) 唔識唔見，我是鐵面金羅，並不是脂粉客，提起都唔啱。。

(建封口古) 爺，相識吓都冇所謂嘅，女，斟杯茶比海陵王飲啦，你要知道呢處教坊，好多人命都係□□

（海燕斟茶跪下介口古）海陵王飲杯茶啦，望你稍加憐憫，莫將此樂府摧殘。。（介）

（彥齡接茶重一才慢的的驚艷將手上茶倒瀉於尚不覺介長花下句）歛鋒芒，垂青眼，梨渦一笑情千萬，最難消受佢眼波橫，淺淺胭脂成雅淡，蠻腰窄窄，輕盈如柳任人攀。。不慣憐香，不慣溫存，唯有痛飲香茶一盞。（失魂落魄飲茶，冇茶照飲介）

（季蘭故意口古）哥，扯罷啦，你最憎呢的地方嘅，重坐咁耐做乜啫，亞哥，的茶老早已經倒瀉晒叻，你重溫咁飲，係唔係想將隻茶杯咬爛。啫

（彥齡一才扎覺跌杯介）

（建封口古）王爺，睇野唔駛咁用神嘅，咬爛隻茶杯唔緊要呀，慌住割親你條脷，補唔番。。

（海燕口古）王爺，唔好毀拆呢的地方叻，如果拆咗就連我都有埋，如果唔拆呢，最低限度都留番我比王爺你時常顧盼。

（彥齡天真口古）唔拆，唔拆，我而家至知道美人樓有此天香國色（笑介）我睇你個樣都係未嫁嘅，我都未娶架，假如你橫掂都要嫁嘅呢，我認為你嫁我就最啱。。叻

（季蘭白）爽快之極

(建封白) 坦白，坦白

(海燕羞介台口花下句) 正在一縷悲酸無處賣，何堪對面把婚談。當年海約永難忘，一點靈犀仍未散。

(白) 唔得，我都要推佢至得

(建封一手拉住白) 你想真至好呀女(長花下句) 亞女你且回頭，望多幾眼，千百歌女慳埋喊，當你係觀

音菩薩下塵寰，捨己為人，女呀你咪頸硬，所謂千斤責任，此時此際都係你一人擔。重話乜野

前生約，又講乜野網內姻緣，虛度五年都好應丟淡。(白) 唔通佢成世唔呢，你就成世唔駛嫁咩，

為人為己，你都要答應呀女

(季蘭三腳橈下句) 一步上前牽衣袖，何必掩面帶羞慚。一曲寄求凰，相逢猶未晚。琵琶尚有主，何必

更向別人彈。。(花) 兄求愛，妹代為媒(介) 只要你一笑便可緣成奠雁。

(海燕無奈一笑介)

(彥齡花下句) 趁今時，解玉佩，作為文定永難翻。花燭夜，一刻難遲，歸備香車迎美返。(交玉佩白)

二妹我地扯叻(與季蘭下介)

(季蘭臨下時走回白) 嫂嫂呀，唔好話唔配呀，配起就啱嘅叻(急下，手下堂旦隨下介)

（海燕口古）爹，係你迫我至答應嘅啫，二十年來個一位夢中人，我對佢嘅印象都未曾丟淡。

（建封口古）傻嘅，過咗五個月都話唔緊要，過得五年就係過得十年廿年嘅叻，唔通要你守到頭髮都白咗重抱住個琵琶去向人賣吹彈。咩（白）個琵琶都有用嘅叻，不如等我破咗佢當柴燒罷啦（拈琵琶欲破介）

（海燕先鋒鉞搶回介口古）爹，我都就呢貴為王室婦叻，你慌有柴燒咩（介）我响呢處十幾年都未曾見過一個知音人，不如我將個琵琶擺响教坊之外，貼一首詩响旁邊，如果有人知道呢隻琵琶叫乜野名，就送咗比佢，都好過將佢無端破爛。

（封建口古）咁都好，喲，你响處寫詩，我有我入去同你執拾的嫁妝叻，我相信尋求知音難上難。（喝歌女同下衣邊介）

（海燕寫詩完貼在紅柱上並將琵琶掛在柱上介詩白）廿年相擁抱。朝彈復暮彈。琵琶當有號。名士當有銜。誰人識此物。抱去不須還。（白）等我坐响處，睇過邊個抱得佢去至得（埋衣邊瓊樓上坐下介）

（鼎儀背玉簫上介南音）玄機妙，耐人參。驚濤海浪，係我嘅小搖籃。有約不須人遞東。波臣為月姥，

洛水是情關。。又怕相逢緣已晚。總之當年有夢未曾殘。。鳳管橫吹引得個隻琵琶返。(二王下句)  
此夜飄搖如一蝶，流浪在，花間。。只見橋畔美人樓，樓外銀光，燦爛。(白)日又行海陵，夜又  
行海陵，叫我去邊處覓取個意中人呢(一才見琵琶上詩讀完笑介台口花下句)有琵琶掛在紅樓  
上，廿年佇候我呢隻燕歸還。。如非我誰是知音人，解下琵琶重一覽。(叻叻古解琵琶欲下介)

(海燕一才喝白)咪行

(鼎儀食住台口企定介)

(海燕叻叻古落樓白)喂，到底你識唔識呢隻琵琶叫乜野名呀

(鼎儀白)我也野唔識呀(回頭重一才慢的的二人相對關目若有前緣介)

(海燕呆然白)衣，我响邊處見過你呢

(鼎儀亦呆然白)係囉，我我我响邊處見過你呢

(海燕一才扎覺口古)我呢隻琵琶唔係咁輕易比人嘅，做乜你一抱咗就行啫，我要你將呢隻琵琶嘅來源闡

明一旦。

(鼎儀口古)呢隻琵琶名叫抱月，實乃先朝遺物，出自古來樂府，今晚月兒斜掛紅樓上，無非都係等待我

呢個才人抱月還。。。

(海燕重一才快的的愕然口古) 你講得啱嘅，我想知道吓你嘅姓名出處，因為你才堪一讚。

(鼎儀口古) 我姓衛名鼎儀，別字叫做波兒(一才) 我個名有來歷架，因為二十年前我係由我個義父响海裏便撈起上呢，至得生存活死裏逃生。。。

(海燕重一才躡椅慢的的成個呆晒介)

(鼎儀愕然白) 你做乜野呀，成個傻咗咁

(海燕花下句) 是否廿年前，魚網內，同生尚有一位女紅顏。。是否有段前生約，是否有段海中盟，到如今我重驚魂未減。

(鼎儀一才愕然白) 點解你會知道咁清楚呢小姐(花下句) 係呀，有一位夢中人，同生死，大抵是前生有債未曾還。。海洋深淺尚能量，我共佢一點靈犀難渙散。(白) 佢今世非我不嫁，我非佢不娶(介)

(海燕苦笑口古) 夢中人(雙) 既然係非卿不娶，非郎不嫁，咁你點解唔呢搵佢呢，所謂前生冤孽，相信係假嘅啫，大抵蕭蕭風雨年復年，有乜野約，有乜野夢都沖到淡。叻

(鼎儀一才茅介口古) 我點會唔搵佢呢，不過搵佢唔到啫，小姐，你識唔識我夢中人呀，佢姓李名海燕，



如困你識嘅，請你通知倩女會痴男。。（拜介）

（海燕一才苦笑口古）嘿，李海燕（雙）如果你係有心搵佢嘅，就天涯海角總相逢，如果你係有心搵佢嘅，就成個海燕擺响你面前，你都唔曉望多一眼。

（鼎儀重一才愕然白）唉吔（先鋒鉞撲埋攬住口古）原來你就係李海燕，怪不得似曾相識啦（悲咽）我唔見到你我嘅靈魂就飄飄無主，好咯，好咯，到今日我至係正式復活重生。。（同哭相思介）

（建封食住哭相思衣邊卸上見狀愕然介）

（海燕憤然推儀躑地介花下句）你五載誤到奴不怪，遲來一日，舊事怕重談。。辜負樓邊月掛簾櫳，廿年不見歸來雁。

（建封白）你呀，你呀（口古）冇咗叻，我同你亞爹約實十五年後相會於海陵，點解你唔依期呢呢，逢一件事丟淡咗幾年，熱極都變冷。嘅啦，冇咗咯，佢已經食咗人家茶禮，就嫁咯，唔係亞燕負你呀，係你自己福薄緣慳。。啫

（鼎儀重一才白）吓，燕你就嫁喎（瘋狂悲苦）你唔嫁得架，你你你嫁咗，咁我我我點啫燕（撲前跪攬反線中板下句）紫雁誤歸期，一聞卿將嫁，寧不珠淚，汎瀾。。輕曳石榴裙，望你呢個夢裏姮娥，

對我重舒，青眼。你試望吓天際雙星，到今尚銀河擁抱，何以我地結合，艱難。。我本是個弄潮兒，雖則誤了佳期，我嘅情心，未減。五年前，逢父病，何忍為訪艷，別鄉間。。（花）此際卿將嫁，我嘅夢將完，無卿我亦無戀棧。（喊介白）燕，嫁番我啦，我嘅養父一病五年，到今年死咗我至呢得搵你啫，嫁番比我啦燕，既有今日何必當初呢（喊介）

（海燕亦喊介）

（建封悲咽口古）喊都有用嘅叻，冇法叻，所以話姻緣嘅野，慢講話爭一日呀，爭一秒鐘唔得就唔得嘅叻，為孝不能盡情，番去鄉下守墓罷啦，傻仔，死唉都有用嘅，聽你又喊個女又喊，連我都喊。嘅啫

（鼎儀喊得更大聲介）

（海燕口古）儀哥，你唔好咁傷心叻，我愛你，我好同情你，假如我真係嫁咗，尚有靈犀一點永遠藏在哥你心間。。

（鼎儀口古）燕，你估我真係想喊嘅咩，我都唔想响你面前大聲喊呢刺激你，想唔喊，的眼淚又忍唔住，你嫁咗就見唔到我嘅叻，我送一隻玉環比你，等你唔好將我忘於一旦。（交玉環介）

（海燕接介口古）好啦，今生難續前生約，希望來生再續番。。

(排子)(內場嘈雜聲)(有口白時排子細聲續玩)

(食住排子四歌女拈嫁妝槓衣邊上介)

(建封茅介白)亞儀你快的避開吓啦，呢迎娶叻，你就想送嫁，最多慳埋樓上揸吓窗口，唔好對眼對鼻(推

儀介)

(鼎儀卸上衣邊樓在窗口望介)

(排子)(手下、堂旦、香車、彥齡上介)

(彥齡口古)燕，我臨夜呢迎接你，搬你去另處一所瓊樓住然後至正式娶你，因為我唔想人地知道你係教

坊歌女流言播散。

(海燕口古)王爺，想落我都係唔嫁得你嘅，能否許我把婚事推翻。。

(彥齡一才口古)咁都得嘅咩，你估婚姻當玩。呀

(建封口古)女，唔好講咁多叻，上車啦，多煩王爺你搵幾個人代亞燕把嫁妝擔。。

(海燕抱琵琶，彥齡扶上車介)

(海燕口頭借意向眾歌女搖手作別，實與儀別介)

(鼎儀悲不能忍狂叫白) 海燕，海燕

(彥齡重一才關目喝白) 呢個係邊個，叫佢躡落呢

(鼎儀張皇卸出介)

(彥齡怒視介)

(建封連隨白) 哦，佢係一個樂師，教坊裏便好多呢亭人嘅，係佢教亞燕彈琵琶嘅，亞儀你都傻嘅，就算

先生送學生嫁都唔駛送到咁緊張嘅，割豬咁聲

(鼎儀望住燕啾咽介)

(彥齡更疑先鋒鉞搶燕之琵琶白杭) 睇唔過眼(雙) 我要把琵琶來毀爛(介) 從今不准你展歌喉，從今不

准你彈鐵板，教坊難准有青年，不准你回頭望一眼。(喝白) 上車啦燕

(海燕上車與齡下介)(手下擔嫁妝隨下介)

(鼎儀一才啞相思鑼鼓連哭帶笑介)

(建封白) 亞儀，亞燕又嫁咗叻，你企响重有乜希望吖

(鼎儀白) 希望就有叻，琵琶又爛咗，我隻玉環又比咗佢，我想得番亞燕多少野做紀念啫

(建封白) 嫁妝都抬咗去叻，等我同你入去睇吓，搵吓有乜野(入拈一雙鞋面復上介白) 喺，亞儀，佢重有一對綉好未上嘅鞋面，你要唔要吖

(鼎儀拈鞋面把玩一遍白) 我要一隻，呢一隻多煩老伯你同我比番亞燕啦，你話比佢聽，他朝倘若此鞋能復合，呢一段冤孽就可以了得叻(交回一隻鞋面與封介)

(建封白) 唔，我都唔明白你講埋一連串咁多神話，你番鄉下抑或响呢處搵食呀

(鼎儀花下句) 此後狂歌當哭，流浪花間。我雖不慣營生，鳳管亦能求三餐飯。(下介)

(建封花下句) 嫁女並非求享福，不願芳華虛度誤紅顏。(白) 點都要跟埋個女嘅(下介)

(落幕)

(第三場) (華麗房景) (幕序一年後)

說明：什邊立體門及窗，窗下有橫枱，上有花樽，衣邊大帳，台口枱上有銀燈，帳旁掛劍，衣邊台口有搖籃、斗官，什邊門外有橫枱

(娟娟、起鳳與兩梅香伴海燕衣邊坐幕)

(排子頭開幕)

(娟娟口古) 少奶洗面啦，搽的粉啦，我真係唔明白你為乜事幹會憔悴成咁。

(海燕苦笑搖頭介)

(起鳳口古) 少奶，梳番好隻髻，插番起隻花鈿都好吖，實在你好幸福嘅，丈夫待你又好，女又生咗叻，

做乜冇事都病帶幾分。。

(海燕苦笑白) 我唔係話唔好，不過我嘅心事你地唔知嘅叻(長花下句)團花鳳，綉紅裙，一年身作賈夫

人，斜倚薰櫳情黯黯，銀屏微掛淚珠痕，鳳燭燒殘還帶恨，怕對新歡強賣顰，一點靈犀仍未泯，

夢中猶記，個一段海中盟。。前生約，已難諧，偷弄綉鞋，難把悲酸忍。(拈綉鞋偷偷指中把玩悲

酸不已介)

(娟娟白) 洗面啦少奶

(起鳳白) 梳番隻髻啦少奶

(海燕一才盟介拍枱白) 我都話唔駛你地服侍咯(伏枱哭相思介)

(季蘭食住上介台口花下句) 已不復輕盈步履，含羞猶怕問來因。。混不覺曲中結下了意中緣，

誰憐憫。(入介覺奇問娟鳳白) 衣衣，做做乜野呀，梗係你地得罪咗我亞嫂叻

(娟娟白) 冇呀，我話倒盆水佢洗面之嗎，佢就嬲叻

(季蘭白) 你地躡番入去啦，我亞嫂駛你地服侍咩(介) 等我親自呢服侍亞嫂啦(寶子先擔橈台口然後倒

水落面盆扭手巾介口古) 亞嫂(介) 亞嫂，的丫環侍婢唔知你意次嘅，我而家倒咗水，扭咗手巾

叻，你行埋呢抹吓塊面，然後至略傅脂粉。啦

(海燕黯然行埋口古) 二姑娘，在婚前婚後，你都對待我無微不至，我塊面抹唔抹都係一樣嘅叻，所謂有

諸內必形諸外，所謂憔悴顏容，當有憔悴心。。

(季蘭一才台口白) 我都唔明白亞嫂點解有咁多心事嘅，等我逃番佢笑至得(仄才一才口古) 呀，亞嫂，

唔好咁愁默默叻，呀，啱叻，地下有一張紙等我摺一隻船仔，擺响盆水處比你玩吓喇(摺紙船於

於盆裏）一個人好似一隻船一樣，好渺茫嘅咋，你又不至靠岸無涯，何必要認真成咁。呢（以手攪水一才嬉笑介白）唉吔，唉吔，摺得唔係幾好，隻船沉咗添

（海燕重一才快的的愕然介口古）船沉（一才）船沉（一才）唔該二姑娘你快的搬開佢，我平生最怕係水，何況聽到兩字船沉。。（嘩然白）拈開佢啦

（季蘭連隨拈面盆埋衣邊擺好白）唉吔，比亞嫂你嚇得好吖，呢隻係紙船仔之嗎，又唔係真船，你駛乜怕呢

（海燕頹然坐下恍似驚魂未定介花下句）盆上沉船思舊夢，低徊寧不念其人。。身在綉閣香幃，魄在驚濤浪陣。

（季蘭走埋口古）亞嫂，你講的野我都唔明嘅，唔好講呢的野叻，唔該你教吓我填詞，教吓我製譜，教吓我指法啦，一年我都有機會再聆教訓。

（海燕一才若有所憶口古）係呢，二姑娘，你唔提起我都唔記得添，你真係進步到不可思議，昨夜我倚欄杆，聽你瑤琴一曲，前後判若兩人。。

（季蘭苦笑口古）亞嫂，你問起呢樣，我就好多說話同你講叻，我為乜事幹會進步得咁快呢，就係呢一年



來我偷偷响教坊裏便認識咗一位樂師，又可以話我愛上嗰個樂師，更可以講係因憐生愛，此曲教自情人，有乜法子唔把閨人驚震。ㄟ

（海燕一才愕然口古）二姑娘，你暗中愛上咗一個樂師，你唔怕你亞哥反對咩，所謂撰曲填詞無價值，你係瓊枝玉葉，怕唔怕門戶不相登。。呀

（季蘭重一才慢慢的悲從中來突然跪下悲咽白）亞嫂，所以我今晚來求救於你啫

（海燕驚介白）唉吔二姑娘，我點受得起呀，你有乜野事，起身至講啦

（季蘭悲咽白）亞嫂，我好應該跪响處講嘅（長花下句）自少愛琵琶，一腔皆情感，鳳笛秦箏皆學問，良宵竟遇意中人，捨卻芳心無餽贈，輕盈一吻以療貧，不料秋燈夜雨橫衾枕，今時豈蔻已胎含。。

求嫂諒，我不是攀柳楊花，我是個多情紅粉。（白）嫂，我都唔記得係幾時幾月……總之我同個樂師係有咗關係，起先……起先個樂師唔肯接受我嘅愛，但係有一次佢病，佢經唔起我再次而再次嘅熱情，亞嫂我嘅熱情你都知嘅啦

（海燕白）我知，你都熱情到出咗名嘅叻

（季蘭悲咽介白）嫂，你做吓好心，响枕頭旁邊同亞哥講吓，唔好等我辜負咗呢段姻緣，□有情人如果不

能成眷屬，死咗時候都唔閉眼架嫂嫂

(海燕扶起介白) 係咯，得咯，唔好嫂我咯(花下句) 輕輕為你抹去痴情淚，我呢個傷心者，好應樂助你呢個有情人。。我難補情天補恨天，決不令你在情場有缺憾。(白) 得叻二姑娘，你番去睇啦

(季蘭白) 唔該你叻嫂，早抖叻嫂(行兩步再回頭) 嫂我已經有……有咗四個月嘅叻

(海燕白) 唉吔，我會着意咯，得咯，比人聽見唔好聽呀，二姑娘

(季蘭再走埋白) 嫂嫂，我而家見你咁温和，我個膽就越做越大叻

(海燕一才白) 唉吔，同人靜靜有咗四個月都唔算膽大，你個膽大起上呢唔知想點呢

(季蘭口古) 嫂，我老實講比你聽吖，我已經帶咗個樂師呢嘅叻，我將佢收埋咗(一才) 唔係收响我個房呀，收埋响花園處架，我想帶佢呢見你，一來向你請吓安，二來等你安心同亞哥講說話，佢呀，

佢真係瀟灑到難以形容，我對住佢唔知點解幾日夜都唔駛睏。架

(海燕口古) 唉吔，二姑娘，你唔駛叫佢呢同我請安叻，我心領叻，所謂森嚴綉閣，那許生客登臨。。

(季蘭口古) 應該嘅(雙) 嫂，你唔駛怕佢會失禮你架，雖然樂師多數係窮，不過識咗我窮極都乾乾淨淨

嘅，嫂，答應我啦，嫂，何苦令我竟夕牽衣求懇。呢(牽衣介)

(海燕口古) 係咯，求祈見吓就算咯，就算勉強到極，我都要順吓姑仔嘅心。。

(季蘭狂喜介白) 係咯囉(雙)(急足行復急足走回介) 嫂，未來姑爺，你見到可以唔錫口教吓佢架(急足下介)

(海燕苦笑白) 唉，比佢嫂到我頭都暈咗，冇錯，有情人難成眷屬，就係死唔閉眼嘅，我唔閉眼啫，我都

唔想人學我(坐下黯然介)

(建封奉承彥齡上介)

(彥齡台口花下句) 我嘅力可呼風，權能喚雨，怎奈難搏枕邊一笑慰痴魂。。我嘅貌不騷，話更甜，何以曲盡溫柔，只搏得辛酸淚印。

(建封花下句) 女婿呀，俗語都有話娶個老婆，好似買隻雀，慢慢囉撚至得貼服宜人。。山前頑石都可以點頭，女人個心肝最易把隆情銘感。(白) 慢慢囉撚吓啦女婿(二人入介)

(海燕一才起身微笑介白) 彥哥，你番呢噏

(彥齡見燕笑亦望住燕痴笑介)

(建封在旁白) 叫你叻，都唔係話唔好笑容吖

(彥齡白) 要佢响心處笑去呢至得嘅

(建封白) 咁就難叻，個心肝會跳嘅啫，我都唔曾聽過話個心會笑嘅

(彥齡走埋攬海燕作愛撫狀介)

(海燕輕避過打乞痴冷介)

(彥齡一才白) 燕，你梗係冷叻(故作火介口古) 外父，你隻眼盲咗嘅咩，你睇見四面的窗打開曬，四面

通風都唔走埋去關咗佢嘅，你亞女打個乞痴，我都好關懷，好着緊。架(喝白) 關窗啦

(建封苦起面口白) 一入呢就要做野叻(關窗介)

(海燕口古) 彥哥，我唔係冷，你對我輕憐淺愛，就算我心肝冷極都總帶微溫。

(彥齡聞語甜極再輕撫燕介)

(建封關好窗走埋懵口懵面望實齡介)

(彥齡一才發覺不好意思次故意火介口古) 嘩，外父，乜你幾十歲人咁冇頭腦架，的窗門關咗啫，度房門未

關都有風嘅吖嗎，你應該出去外邊順手將度房門掩𡗗。

(建封一才苦起口面不欲吟沉介)

(海燕口古) 彥哥，關窗關門都總有丫環侍婢，何必要辛苦到亞爹佢幾十歲人。

(建封白) 亞女你都懵嘅(花下句) 關窗關門都誠廢話，實在佢唔想我阻頭阻路，至喝到我兩頭騰。。一年夫妻重好似初洞房，女呀你夫婿嘅隆情你當銘感。(出門並掩門下介)

(彥齡白) 記住你亞爹嘅說話至好呀燕

(海燕點頭白) 我點，彥哥，我今晚有的野想同你商量吓

(彥齡一才狂喜白) 燕，有乜野同我商量呢，做咗一年夫妻叻，都未曾見過你同我有商量，有斟有酌嘅，今晚認真好日子叻，等我擔多張橈開呢，你坐一邊，我坐一邊，你挨住我，我挨住你，無事不可傾，無事不可講(擔橈台口拍埋介)

(海燕檢衽白) 唔該叻彥哥(二人坐下介) 彥哥，我同你講一件野，不過我講出呢之後，你唔好鬧我，你唔好騷我

(彥齡痴笑介口古) 唔會騷，唔會鬧，不過我已經知道你想講乜野呀，你梗係覺得呢年來對我唔係幾熱情，想想吓個心都係過意唔去，梗係想叫我以後唔好咁夜番呢，早的陪你睏。喇

(海燕一才羞介擺頭白) 唔係(口古) 我今晚想同你商量嘅就係二姑娘標梅已屆，好應及時論婚。。

（彥齡一才失望成個傻曬介）

（海燕白）唉吔，做乜野啫彥哥

（彥齡失望介口古）一年來未曾見你對待過我咁好，我一心以為有鴻鵠將至，原來一提出就係我妹嘅事，

你話有乜趣（一才）有乜癮。呢

（海燕笑介口古）咪咁傻啦，夫妻上頭乜都會講嘅啦，我以為做兄長嘅，好應該為個妹嫁杏關心。。

（彥齡盟介白）而家我唔關心亞蘭咩，佢歡喜嫁比邊個唔係嫁囉，至多要銀我比，要屋我比，要嫁妝我比

咁唔係算囉

（海燕白）係咁得啦，佢而家已暗中愛上咗個樂師叻

（彥齡重一才躡椅白）樂師呀，唔嫁得

（海燕白）做乜唔嫁得啫，樂師唔好咩

（彥齡憤然長二王下句）怕聽鳳笛與秦箏，不信琴師能振奮，只曉哀絃寄怨，點配做護花人，雖則司馬長

門，一曲能封蔭，怎奈提橋綠馬，白首誤文君，愛妹當求花有幸，不願把佳人絕代，葬死在曲苑，

詞林。。王謝堂前，不願聽求鳳音韻。（包一才白）嫁樂師就唔得，我呢世人最憎樂師嘅

(海燕長二王下句) 稍加體諒女兒心，莫在情場多作梗，當念我年來啟齒屬初勻，姑也聰明精樂韻，何忍求凰曲變，斷腸音，暗裏牽衣重哀懇，莫個難為月老，莫令淑女傷心。。總之有仗護東皇，何苦要誤其嫁杏。(白) 就咁啦，麻麻地啦

(彥齡盟介頓足掩耳白) 我唔聽(雙) 你唔好講(口古) 我呢世人，一出咗主意就收唔回嘅叻，唔好講叻，早的睏。啦

(海燕晦氣坐下口古) 你唔係睏先囉，一個人代人做一件事，做唔妥都睏得着嘅咩，頭一次向你開口啫，就一的面都有叻，我再唔會開口向你唉迥第二勻。。(頓足介)

(彥齡一才更盟介口古) 蝦，所以話你個人不知所謂愛(一才) 不知所謂情(一才) 溫柔不足盟爭有餘(悲咽) 有乜情感。㗎

(海燕更悔氣口古) 係係係，我係不知所謂愛(一才) 不知所謂情嘅叻(一才) 你即管鬧即管騁啦，我勢唔會响你跟前認錯，向你把茶斟。。(掩面泣介)

(彥齡成個軟曬介白) 睏唔睏呀你

(海燕一才盟介白) 唔睏(一才)

(彥齡沒趣自言自語白) 你唔睇，我睇，你慌你一陣唔會埋呢睇呀(埋床欲睡復開台口白) 錫吓個女至睇  
得着嘅(埋抱斗官一路噯，一路裝模作樣埋燕旁介) 叫聲媽咪啦女

(海燕盟白) 躡開

(彥齡白) 躡開唔係躡開(憤然) 我呢世人，老婆，我又錫，女我又錫，妹我又錫(悲咽) 將來唔知邊個  
錫番我啫(急足放斗官於搖籃上床蒙被而睡介)

(海燕台口白) 唉吔，我唔知點同二姑娘講呢，冇法叻，等亞彥的火氣下咗之後，再陰聲細氣唉吓佢係啦

(埋帳白) 彥哥，彥哥

(彥齡詐睇不睬介)

(海燕白) 唔怪話佢個人冇心肝嘅叻，盟僅都可以睇得着嘅，一落床就好似豬嫗賣仔咁，推極都唔醒叻(一  
路講一路開台口坐下介)

(彥齡向台下白) 你估我真係睇着呀，我詐睇之嚟，咁易睬番佢呀，唔唉得五六十勻，睇我睬唔睬佢吖(詐  
睇介)

(快云云)(季蘭拉鼎儀「白紫標漢裝」上介)



（建封食住靜靜跟上慳埋什角枱旁偷看介）

（鼎儀台口花下句）我本無心求鳳友，奈何一夕錯銷魂。縱有三分膽力進瓊樓，亦難□□□偷香不慎。

（建封在旁聞語誤會介）

（季蘭向儀白）唉吔，好心你唔好咁木口木面咯，見我亞嫂呀，放寬個面口，見到我亞嫂要講多幾句好說

話，落多的咀頭，女人係要氹嘅（肉緊細聲）蝦，唔知點解我咁中意你，好似冇咗你唔得咁，其

實你除咗彈出呢嘅音範動人之外，眼、耳、口、鼻，都死曬，冇厘可取嘅（介）企响處等我拍門

啦（拍門介）

（海燕細聲白）邊個呀

（季蘭鬼鼠白）我呀嫂，個人帶咗呢叻，入唔入得呀

（彥齡碌大眼注意介）

（建封誤會介台口白）嘩，乜咁搞法

（海燕茅介白）夜夜，呢咗呀，不如我出呢罷啦（介）唉吔，都係唔好叻，不如入呢啦，橫掂你亞哥睏得

咁啱（急足埋落帳復開台口坐下介）

(季蘭一路吟沉帶鼎儀入介)

(建封連隨埋窗口偷看見齡詐暎台口白) 闖禍叻

(季蘭鬼鼠白) 嫂呀嫂，個人呢咗叻

(重一才慢的的)(海燕、鼎儀相對關目百感交集介)

(季蘭食住奇介台口掩口笑白) 你睇吓亞嫂一見到佢就入曬神叻，唔駛講都係受落啦，受落就唔慌佢唔响

亞哥面前落力啦(介)(略羞)嫂，嫂呀，就唔係佢囉，佢呀，點啫嫂

(快沖)(娟娟上)(建封避埋一角)介拉蘭白) 二姑娘，奶奶病，醫生呢咗，叫你即刻入去佢房啁(下介)

(季蘭白) 嫂，我去一陣至番呢，你即管教(教字細聲)即管傾(傾字特別細聲)即管即管

(彥齡怒上眉梢介)

(建封埋窗見彥齡又不敢出聲肉緊介)

(海燕口古) 儀，你埋呢啦(介)(二人貼面細聲)而家咁就好叻(大聲)雖然我同你緣訂前生(細聲)

但係到今日，彼此都身有所屬(苦笑)傻嘅，相見何苦悲酸成咁。ㄟ

(鼎儀悲咽口古) 燕(大聲)你係我嘅，我係你嘅(細聲)不過天下事好難預料，我，我之共亞蘭，非關

薄倖，都只為清貧。。（喊介）

（海燕細聲親暱口古）了叻，了叻，以後你忘記咗我，我忘記咗你，你一生亦唔駛咁孤零，我一生亦唔駛咁哀感。啦

（鼎儀口古）係，想唔忘記都唔得啦，燕，我以前送咗一隻玉環比你，你比番我啦，一來免至你觸目傷心，二來我嘅物件（悲咽）已經唔配繫在你嘅腰圍，貼近你嘅芳心。。

（海燕白）好啦，我要解開幾粒衫鈕至攤得番比你架（背齡作解鈕狀介）

（彥齡茅介台口白）唉吔，唉吔，解衫鈕添

（建封忍不住大聲白）因住至好呀，女

（彥齡乖燕不覺先鋒鉞埋帳邊取劍叻叻古刺儀，在頸邊掠過介）

（鼎儀食住大叫白）唉吔（以手摸頸揸破紫標重一才慢慢的關目沉花下句）唉吔吔，劍底離魂。。（不支

倒地介白）我死叻（雙）

（彥齡再先鋒鉞撲埋欲殺介）

（海燕食住先鋒鉞撲埋攬住介白）你唔好殺佢呀

(彥齡一才海燕躑地再先鋒鉞欲殺介)

(建封食住攔介白) 你唔好殺佢，聽我講，聽我講

(彥齡白) 我唔聽(掬開建封躑地快五才頓足號啕大哭撒花上句) 慧劍一揮，已變瘋狂殘忍。嘆羅襦，為

誰偷解(一才) 青紗帳外，你以肉體迎人。。撩火雁(一才) 逗梟雄(一才) 若不血濺南樓難洩

憤。(先鋒鉞介)

(建封食住攔介花下句) 佢兩個以前有好深關係

(彥齡火介悲白) 梗係有啦，冇佢係咁咩

(海燕白) 爹，你講說話講得咁論盡，唔好講叻

(建封續花下句) 佢兩個關係我都好難比喻，總之比海還深。。見到面攬吓又有乜問題，佢兩個丫仔咁大

就攬埋好煙靚。

(彥齡重一才慢的的火介埋摑燕兩巴白) 哦，已經煙靚咗好耐嘅叻

(海燕白) 你即管打我啦，求祈你唔好殺佢就得叻，我同佢

(彥齡白) 你重幫住佢(一才)(雙)(頓足快點下句) 猶如猛虎欲噬人。。一劍能消仇與恨。(先鋒鉞撲

埋白) 斬斷你隻偷香手(一才)(雙)(食住一才刺儀雙臂介)

(鼎儀左右臂露紫標狂叫白) 唉吔，不如你兜心一劍等我死得自自然然罷啦(跪埋求死介)

(建封見狀高聲叫救命介)

(叻叻古)(二梅香與季蘭上入介)

(季蘭撲埋儀處跪下白) 唉吔，亞儀，邊個咁狠心殺害你

(鼎儀指彥齡白) 係佢，係佢

(季蘭先鋒鉞執齡台口火介口古) 你唔好以為亞爹死咗之後，你承受先人遺業就可以權操一切(一才) 我

叫你呢個妹夫呢見吓大嫂之嗎，叫呢比你殺嘅咩(一才) 如果佢真係死咗，我殺番你都敢。(打齡

一巴介)

(彥齡食住打回蘭一巴一才白) 妹夫，哈哈(一才) 妹父，哈哈(一才) 我唔係懵嘅(介) 我唔係傻嘅(介)

(口古) 二妹，你唔好自己拿咗上身而替個嫂呢受過，陋室中，孤男寡女，你睇吓(火介) 而家

你亞嫂都未扣衣衿。

(季蘭一才愕然口古) 係呢亞嫂，點解你見佢見到衫鈕都解埋架，無端白白咁解衫鈕做乜野啫，就算見姑

爺都唔駛咁。架

(彥齡更火口古) 傻蘭，蠢蘭，解衫鈕做乜野你都唔識，咁你又曉得引蛇入屋，千日都係你隻衰野提壺把酒斟。。(撲埋亂巴打蘭介)

(鼎儀白) 你唔好打佢，我也野都認(一才)(長花下句) 尚有三分命，聽我再呻吟，當日我地同死同生同不幸，賈夫人是我舊時人，雖則誤了佳期成缺憾，自信玉人心內，廿年長有我呢個俏郎君。。  
今生未許結良緣，來生亦會同衾枕。(白) 我怕乜講吓，我地今世唔孖埋，都有第二世嘅

(彥齡重一才憤然悲咽白) 你話聽唔聽得入耳(一才)(雙句)(先鋒鉞以劍柄打儀介)

(季蘭悲憤狂笑介白) 打大力的啦哥(雙) 打佢唔死我唔心涼架

(彥齡再打儀介)

(海燕先鋒鉞撲埋跪下乙反中板下句) 佢好比血人兒，半已魂離天外，你寧堪煮鶴，且莫焚琴。。他不是竊玉偷香，背解羅襦，心上玉環，乃是郎所贈。雙淚已如珠，碧玉難皎潔，欲將此物還人。。(正花) 我非紅杏出東牆，佢更非浪蝶臨閨□。(白) 彥，我同佢有緣有愛，但係冇關係嘅

(彥齡重一才慢的的白) 吓，你同佢冇關係嘅，咁我唔係殺錯……(漸軟介)

(季蘭狂笑白) 哼，有緣有愛都會冇關係嘅，殺佢啦哥(雙)(狂笑) 所謂愛之欲其生，惡之欲其死，殺佢啦哥(瘋狂迫殺介)

(建封拉開蘭白) 二姑娘，佢兩個真係冇關係嘅

(季蘭瘋狂推開封白) 鬼信，鬼信

(鼎儀白) 蘭，你亞哥唔駛再殺我都死嘅叻(爭扎起身介) 蘭你行開呢，我靜靜地同你講幾句野啦，蘭，人地唔聽得嘅(介)

(季蘭台口悲憤介白) 講啦

(鼎儀執蘭手寶子口白) 蘭，總算我對你唔住，你肚裏便嗰個將來姑勿係男亦好，係女亦好，你唔好因為憎我，恨我，而待差佢，好好的愛錫佢(介) 我想送番的野比我將來嘅兒女做紀念物，但可惜我又身無長物(介) 呀，我嘅身邊重帶住一隻綉花鞋面(靜靜交介) 你將來同我傳比後人啦，我對你唔住叻蘭(執手的的跪下死介)

(季蘭食住慢的的苦笑標眼淚一才狂叫鼎儀介)

(海燕哭相思介)

(季蘭一才瘋狂白) 唔准你喊(一才)(雙句) 我都唔喊你喊(台口花下句) 人已暗隨黃鶴去，腹中塊肉尚偷含。。我嘅人未嫁，我嘅事難揚，哥呀，我要永別家庭長飄隱。(白) 哥，我要脫離呢個家庭，我要有咁遠去咁遠

(彥齡悲咽白) 二妹，我都知道你好刺激，暫時住向外便散開吓啦，你要錢唔要吖

(季蘭白) 我乜野都唔要，我只要拖咗個屍葬咗就算叻(行兩步)

(海燕悲咽白) 二姑娘，我對你唔住，我累咗你叻

(季蘭重一才回頭慢的的望實海燕由悲憤轉狂笑以口涎唾之則呼梅香扶屍同下介)

(娟娟食住此介口上叫白) 大少呀，奶奶病得好危呀

(彥齡一才白) 吓，我亞媽病得好危(執娟沖下介)

(海燕先鋒鉞跪埋摸血跡慢的的關目悲咽口古) 鼎儀，鼎儀，乜野叫做前世孽緣呢，而家見你遺下嘅一堂鮮血，我都唔知是悲是苦，是酸還是憤。

(建封口古) 亞女，唔好話亞爹响你咁淒涼嘅時候呢鬧你口吖，燈蛾唔見火就唔會撲嘅，千日都係你累死人。。



(海燕牽衣悲泣介口古) 爹，我問聲你叻，前生姻緣個幾個字，到底會唔會有架，我望你答覆我呢句不能自解嘅題問。

(建封盟介口古) 冇嘅，冇嘅，如果係有嘅，今日唔係同埋時候死，又點會當日同埋時候生。。

(海燕重一才慢的的若有所悟連隨拈劍自殺介)

(建封連隨抱起燕坐台口狂叫亞女介)

(彥齡叻叻古上見狀狂叫白) 燕，做乜你又自殺呀

(建封白) 你冤禮佢就梗係自殺啦，好聲行亞女

(彥齡連隨跪下乙反二王下句) 方信是前生孽債，你尚有冰雪之身。我嘅人到瘋狂，惟有把芳軀搖撼。

(狂叫介)

(海燕寶子托白) 彥，我都知道對你唔住，我共亞鼎儀只可以講有靈犀一點通，冇第樣嘅，我希望你唔好

憎我，恨我，而待薄個女，你要好好的愛錫佢(介) 我想留番的野比我個女做紀念，但係彌留中

身無長物，呀，我重有一隻綉花鞋面，你同我交比個女啦(交介) 我真係對你唔住叻彥(慢的的

執手跪下死介)

（建封搥心哭相思介）

（彥齡食住埋抱起斗官悲咽白）你亞媽死咗叻，快的喊吓你亞媽啦女

（斗官喊介）

（彥齡花下句）此後我一生人唯一女，早斷七情與六根。。

（連隨落幕）

(第四場) (破落戶後苑連後門景)

說明：衣邊角為後門，正面圍牆，什邊有竹籬攔住，衣什邊大樹，衣邊台口有木架掛燈，燈下擺大紡織機一架，並刺綉之物……幕序十六年後……

(季蘭(裙布荊釵貌憔悴) 坐幕織布介)

(木蘭從軍開幕)

(季蘭在刺綉介一才停針木蘭從軍唱) 典去紫金釵，苦處甘長捱，傷心嘆命乖，愛根盡已埋，十數年獨處青階，一世還孽債(乙反木魚) 唉，還孽債，守寒齋。斑斕淚印，未離懷。昔日紅樓，錯把痴情賣。方信哀弦一曲，誤裙釵。勸兒莫把秦箏買。又怕買來鳳管，觸慈懷。夜夜機杼勤修，幾至雙眼壞。(雙)(正二王下句) 換取青蚨串串，添幾對錦繡，花鞋。一點點淚灑青燈，一縷縷愁絲，莫解。原是綺羅粉黛，何以換了裙布，荊釵。(雨打芭蕉頭段) 身世悲酸，念前塵多不快，苦海無涯，人亦漸蒼老憔悴，花不戴，貌已消失曬，只瘦骨慙慙如柴，情已斷蒼老憔悴毀形骸(反線中板) 半世蝸居，我呢個淑女無顏，惟有困在東籬，怨艾。最堪憐，倩女生還未嫁，何以有個十六歲，兒孩。不敢背兒悲，不敢向人啼，鬼叫我一身，是債。往日喝婢呼奴，今日辛

勒灶下，煮三餐茶飯，幾樹枯柴。。（花）可憐此王族中人，經已捱到半顛半壞。（白）個仔已經大咗叻，我好愛個人，但係好憎佢嘅樣，我都唔知是還是愛（介）不過亞小儀呢，真係抵錫嘅，又孝心，又好學，□十六歲喺已經有才子之名叻，下至街坊鄰里，上至名公巨卿，佢所寫嘅詩詞，有邊個唔爭相傳誦，所以我唔食比埋佢食，唔着比埋佢着，我想佢就笑叻（介）不過想起佢亞爹呢，哼，真係黝到今日都黝唔了呀（介）

（小儀上介花下句）彩毫自有千鈞力，英風不似小兒孩。。承母教，萬卷腹藏，並不是我夜郎自大。（入叫白）亞媽

（季蘭白）番呢叻，仔

（小儀口古）媽，我得閒陪你傾偈叻，我要入去寫文章，你知啦，我自從寫咗個一篇南宋血淚史，所有海陵嘅父老，三郡嘅遺民，對我越加崇拜。

（季蘭口古）仔，咪咁牙擦擦啦，你都重大唔透，你嘅學問都係响我處得番呢，我都係一知半解嘅咋，一個人得些名譽，就好心足叻，再寫落去就比人屨。。

（小儀口古）亞媽，你唔知嘅叻，當今元太祖想收買人心，接納所有遺民嘅提控，我就係執筆人叻，媽，

你唔好睇我年紀細細，我嘅權威有時都幾大。

(季蘭重一才口古) 仔，你講乜野話，實在你寫的係乜野呀，千祈唔好人擠你又擠。。

(小儀白) 媽，你問我寫乜野呀，利害叻(花下句) 筆如刀，詞如劍，忠奸善惡都有安排。。一寫國賊禍黎民(一才) 再寫權奸將國賣。

(季蘭重一才慢的的心有所觸一才喝白) 唔准(花下句) 丈夫若無撐天手，當把鋒芒暗裏埋。。我望你帶挈我衣錦榮華，不負我對你一生攜帶。(白) 教你，養你，供你，就係我做亞媽嘅責任，等我着好，食好，住好，就係你做仔嘅責任，我而家捱到頭髮都將近白曬叻，重未曾享過你嘅福，重唔比心

機搵錢(一才) 寫曬的咁嘅無謂野(一才)

(小儀不歡介口古) 亞媽，在表面睇呢，你的確係一個偉大慈母(一才) 但係睇深一層呢，你不過係一個小婦人啫(一才) 你而家有福享咩(一才) 不過你唔享之嗎(一才) 蝦，兩仔乜唔好得幾耐又試將交嗌。

(季蘭一才慢的的性格突變口古) 小儀，所以我承認我憎你多過錫你，因係越睇越憎你嘅叻(介) 乜野叫做有福唔享呀(一才) 我去邊處搵福享呀(一才) 我唔好命，我有一個仔十六歲都唔曉思量去搵

錢，重要我磨穿十指咁為佢捱。

(小儀口古) 你有福享，你估我唔知呀，人地話我舅父大把錢(一才)我舅父大把錢點解你有份吖(一才)  
如果唔係你舊陣時做錯事呀，我相信你而家都金腰帶，銀腰帶。呀

(季蘭重一才慢的的躑椅白) 算咯，算咯(瘋狂) 你，你都害得我慘咯

(小儀白) 媽，我幾時害過你呀

(季蘭口古) 小儀，你行開，我而家覺得企响我面前嘅，唔係我個仔，係另外一個人仔，你好行開，唔係  
我揸死你都有之(介) 我估唔到一失足成千古恨，遙遙一世咁難捱。(瘋狂介)

(小儀跪下花下句) 待我向娘重呵錫，我不忍見兩行清淚灑慈懷。我願受你夏楚橫施，但望你勿瘋狂變  
態。(拈柴一枝白) 媽，你打我啦

(季蘭先鋒鉞接柴慢的的苦笑白) 仔，我唔捨得打你，我而家嘅神經漸漸回復，我而家顛完叻，狂完叻，  
仔，番入去啦，我唔想見你個樣，令我驚心觸目，番入去一陣，等我抖過啖氣至出呢啦

(小儀悲咽白) 點樣你咁憎我個樣啫媽

(季蘭盟介喝白) 番入去啦(一才)

（小儀食住一才驚慌衣邊卸下介）

（季蘭白）呢十幾年來，我就响呢種喜怒無常嘅狀態中過渡咗叻，我個仔又生性過頭，唔知佢有冇寫咗我亞爹一生嘅事跡出呢啫，如果有嘅，就真係冤冤相報叻（介）我要坐响處抖吓氣（介）幾十歲人真係唔衫激嘅

（小燕携紅柬上介台口花下句）自比彩樓一小鳳，從來不易到窮街。寒梅滿佈在東籬，此地亦不是尋常境界。（白）人地有個亞爹，我亦有個亞爹，我相信人地亞爹就大不同叻，你地見過未吖，我咁大個女叻，亞爹一日至少都錫我幾十勻，所以人人都叫我做女皇帝（介）亞爹聽日生日，沉晚同我講起，原來我重有個姐姐嘅，離開咗十六年都未曾番過去，叫我派張貼呢比佢，叫佢今晚番去同亞爹見吓面，順便煖吓壽（介）呢處就係綠楊巷一號叻（掩鼻介）唉吔，點解的地方咁辣搥架（入介關目一才白）伯爺婆呀，我姐姐响度嗎

（季蘭一才抬頭介慢的的似曾相識愕然介白）邊個係你姐姐呀

（小燕白）我姑姐叫做賈季蘭

（季蘭一才扎硬姑姐款白）我就係叻

(小燕白) 伯爺婆，你就係我姑姐，唔似我亞爹個樣，我亞爹重好後生，你就又眼蒙，又駝背，好似我亞麻咁，點會係我亞爹個妹啫(介) 你話係我姑姐，你知我亞爹叫乜野名呀

(季蘭一才氣結介白) 喂，我正話至激完，唔好再激我囉啫，你亞爹叫乜野名呀，叫賈彥齡囉(一才)

(小燕白) 呀，咁你真係我姑姐叻(口古) 衣，乜姑姐你着埋曬的咁嘅衣服架，塊面已經巢叻，重着埋曬的咁嘅裝老衫，十足隻殭屍一樣，冇錢買就搵我吖，贈幾件你又點話啫，咁嘅樣子，又點似得係海陵王府裏便嘅二姑奶奶。呀

(季蘭重一才氣結口古) 姪女，你估我有衣服呀，冇，不過我唔着啫，有身份嘅人，好應該老實的嘅，唔通學你咁樣搽脂蕩粉，成個女亞飛咁妖妖孽，不分早晚，只顧躡街。。

(小燕口古) 你，你又點識咁多野吖老姑婆，而家興吖嗎，你成世慳埋响窮街陋巷，又點知道近來世界。

吖

(季蘭口古) 好囉啫(雙) 唔好咁放次啫姪女，你識唔識分上下尊卑呀，到底你呢搵我做乜野，係唔係有意想呢把我屣。。

(小燕笑介白) 咁又唔係(花下句) 訪蓬門，不嫌霜露重，那怕濕了弓鞋。。也非為祝壽，只望燕還巢，



我親自到來將帖派。(白) 姐姐呀，我亞爹請你番去飲杯壽酒啲。(介) 姐姐呀，老實講叻，到底你有冇錢做人情嘅啫，冇就預早同我商量吓叻，姑姪上頭唔駛客氣叻

(季蘭接帖重一才慢的的悲喜交集一才嘆息搖頭介白) 我唔去叻(花下句) 一自離家經半世，賤骨頭只配寄在天涯。。長兄何苦望妹歸巢，見此心情不快。(白) 我唔去叻姪女，你番去同我多謝你亞爹啦

(小燕口古) 姐姐，你真係唔識趣叻，你都自量，你都知道自己係賤骨頭，你估好易得我亞爹派張貼比你嘅咩，好心你呢種咁嘅無聊架子，就無謂擺。啦

(季蘭重一才氣結口古) 噎吔，做乜你話我擺架子呀，我心情唔好，我唔願去(一才) 如果我要番去，何必要等到今時今日啫，就係我唔想番去做二姑奶。。

(小燕口古) 你唔想番去，你敢番去得架，雞春咁密都哺出仔呀，姐姐，你自己的所為唔好，就唔好咁豪氣，如果有我傍住你，你試吓番去吔，包你未曾踏入神廳咋，就好多人向你靴生曬。

(季蘭重一才離橈慢的的口古) 唉吔，我乜野唔好，我十幾年來冰清自守，你慌我對唔住祖先靈牌。。呀(小燕白) 姐姐你冰清自守(花下句) 老姐姐，你離家之時還未嫁(一才) 緣何有仔暗收埋。。請你唔好

講四字玉潔冰清，因為我都係未嫁姑娘，會比你陀衰曬。

(季蘭重一才躓椅慢的的喘氣掙心介)

(小燕白) 姐姐，唔好掙心叻，你瘦到一隻鴨殼咁，掙起上呢卜卜聲有乜為呀

(季蘭一才瘋狂喝白) 你扯(一才面口啞相思連哭帶笑介)

(小燕走埋跪下介白) 唔好騁叻姐姐，我唔敢激你叻

(季蘭見燕跪氣稍平介)

(小燕白) 衣，姐姐，我跪你啱唔啱架

(季蘭一才復盟介白) 乜野叫做唔啱呀

(小燕白) 咁我而家唔係跪僅邊有起身啫(悲咽) 問吓之嗎(乙反長二王下句) 長跪在青階，更把溫情賣，

好一比依人小鳥，暗投懷，縱使我語帶囂張，姐姐你休見怪，我已經飄零孤苦，何必狂怒，為了

兒儕。我為你抹淚搓心，為你把愁懷，盡解。(牽衣悲咽白) 姐姐，番去啦姐姐，沉晚亞爹提起

你嘅時候，佢又喊，我又喊，一個人骨肉之情梗有嘅(喊介) 姐姐可惜我亞媽死得早咋，如果我

有個妹呀，我唔知錫到佢點呀，我亞爹唔係同我一樣，番去啦，姐姐(介)

(季蘭一路聽一路喊介白) 係咯，係咯，起身啦(花下句) 正話佢三言兩語氣到我心膀裂，點知佢忽然咁

快又賣口乖。。搞到我啼笑兩不成，又愛又憎難分解。（白）乖姪女，你頭先講個番說話，都幾抵錫嘅（介）骨肉情點都有嘅，既然你亞爹咁掛住我，我都好應番吓去（介）我要換過件衫至去得嘅，你坐响處玩吓，等吓我，唔啱我叫個仔出呢陪你叻

（小燕白）唉吔姐姐，原來你真係有啫仔架

（季蘭一才愕然白）吓吓，仔就有個仔，係擺番呢嘅，你唔好話比佢聽呀（卸下介）

（小燕埋機旁拈綉花圈一看介白）蝦，估唔到亞姐姐眼蒙蒙，的手工做得咁好，等我拈開去光光地欣賞至

得（坐於正面台口介）

（云云）（小儀上介欲呼又怕醜卒埋叫白）表姐，表姐

（小燕一才抬頭白）表哥（重一才慢的的關目二人若有前緣介）

（小儀怕醜介白）表妹，今晚好似番咗風嘍

（小燕白）係呀

（小儀更怕醜白）個月光好似幾靚嘍，夜

（小燕白）番風又邊處有月光呢（介）表哥都唔曉講說話嘅，不如我搵的話同佢講罷啦（介口古）表哥呀，

你睇亞姑姐嘅綉工幾靚，綉住呢對係鴛鴦呢嚟，表哥呀表哥，鴛鴦兩個字到底係點解。啫

(小儀口古) 我點知點解呀，表妹，我亞媽嘅手工就麻麻地咋，你想睇靚野，我比一件隨身嘅物件你睇吓啦，就係單單獨獨一隻綉花鞋。。(拈鞋出介)

(小燕接介慢的的玩弄笑介口古) 唉吔，表哥，做乜你咁鬼鼠架，原來你會偷嘅，呢隻鞋係我嘅，點解你隻閃電手偷得咁快。嘅呢

(小儀口古) 表妹，你千祈唔好話我偷野呀，我重要搵食架，呢隻鞋我自小陀到今日，半刻未離懷。。

(小燕白) 咁奇，係你嘅，你拈番住佢(介) 等我自己檢查過先(介) 唉吔表哥，你睇吓(雙) 我都有一隻呀，大家呢對過睇吓係唔係一樣(二人對鞋介)

(小儀白) 真係一式一樣呀，表妹

(小燕白) 咁點會你一隻我一隻呢，表哥，我同你梗係有好大來歷嘅

(小儀一才白) 呀，我而家都微有所悟叻(長二王下句) 此事費疑猜，莫非有前緣連帶，若非有孽緣未了，點會有對綉花鞋，微妙機玄，也非難參解，似兆珠還合浦，又好似復合，粉釵。。我共佢若有靈犀，莫非緣結前生，上界。(白) 表妹，我一見到你似曾相識叻，又有呢對鞋，我以為我同你一

定……

(小燕白) 一定係前世我同你係夫妻呢定叻，你駛乜怕醜，唔敢講埋落去啫，前世做咗就算今生同你再做一次，我都唔嫌棄(長花下句) 默默半含情，輕弄紅綾帶，倘若前生未了相思債，今生仍可再續埋，也非故把痴情賣，慰安唯有倚郎懷。。綉花鞋(雙)，未結同心難得佢暗為媒介。

(小儀輕擁燕白) 表妹，你真係嫁我

(小燕點頭介)

(小儀一才口古) 唔得，唔得，姑表嫡嫡親，不比姨表可以成婚，我共你結婚會比人責怪。

(小燕口古) 咪咁傻啦，表哥，你真係我姑姐生嘅咩，你擺番呢養嘅之嗎，姑姐叫我唔好同你講個句我都

講埋。。

(小儀一才白) 哦，原來我唔係你姑姐生嘅

(小燕白) 梗係唔係啦，我姑姐未嫁嘅咩嗎，你有亞爹冇咩(介) 冇咩嗎，冇又點有仔生啫

(建封一路叫小燕上入介乙反木魚) 嘩，外孫女，原來响處斟世界。難為我搵盡幾條街。。你亞爹當你係

傳家之寶，半刻都未肯離懷。。見你咁夜都未番歸，响屋企都嘈生曬。飯都唔肯食，伸長條頸盼

望你呢個小乖乖。。小燕你以後唔好背我離家，我真係保你大。雖然你係將帖派。派完就扯，點解同佢傾到連面都貼埋。。(白)扯啦

(季蘭食住此介口着華服卸上介)

(小儀白)亞媽，你着得咁靚去邊處

(建封愕然白)嘩，我以為人地傳說嘅啫，原來真係有仔嘅

(小燕白)外公，表哥係擺番呢之嗎(一才掩口已來不及)唉吔，對唔住叻姐姐，我不過愛錫你嘅名譽，

口快快講出呢咋

(季蘭一才啼笑皆非介口古)小儀，我番去你舅父處，你唔好跟埋呢叻，你响屋企睇門口，比心機讀吓書

啦，科期已屆。

(小儀怨介口古)哼，你梗係唔帶我去啦，我都唔係你生嘅，邊處有資格番去見舅父吖，你唔怕人笑，我都怕未人擠。。呀

(季蘭一才反應介)

(建封口古)二姑娘，就算係擺嘅，都唔着帶佢番屋企，未嫁老姑娘，識嘅就話你擺個仔慰吓寂寥，如果

唔識嘅就好多閒言閒語叻，因為你個契仔生得牛高馬大。

（季蘭一才反應介）

（小燕口古）姐姐，咪話我話你吖，你無端白事擺個仔番呢做乜啫，你保得你呢世唔嫁咩，如果你嫁親就累人挽油瓶，名譽不佳。。

（季蘭重一才慢的的啾咽介）

（建封白）喊乜野吖，我教你做人啦二姑娘（花下句）白髮姑婆無好處，睇你闌珊瘦骨已如柴。。就算你容顏枯老面皮黃，上好沉香唔憂賣。（白）二姑娘等我帶你番去見你亞哥，你就响你亞哥面前講番幾句好說話，等佢打發你嫁鬼咗唔係好囉，原本呢，你個樣就撈飯貓都唔食嘅叻，不過憑住你亞哥嘅面子，你慌冇人要咩，你想嫁個十五六歲嘅老公仔都得呀（拉蘭同下並回頭叫燕下介）

（小燕細聲白）喲，表哥，我一於係你嘅叻，你駛乜跟埋姐姐去見舅父啫，你唔曉呢搵我咩，我亞爹就係海陵王之嗎，王府响邊處係人都知道嘅叻

（建封復上喝小燕介）

（小燕飛奔與建封下介）

(小儀叫白) 表妹，表妹，弊叻，我而家至知道舅父就係海陵王，我前個月代三郡父老寫咗一張聲討書密獻咗比元太祖，唔知而家收唔收得番呢(快花下句) 是仇是愛，我趕速安排。(奔下介)

(落幕)



(第五場) (華麗房景)

說明：什邊立體門及窗，正面大帳，衣邊台口枱，上焚檀香，並觀音像，衣邊有臥室門，籐條皮鞭

(四梅香伴賈老夫人(蒼髮掛佛珠)跪於衣邊枱旁敲卜魚介)

(爐香讚開幕)

(老夫人敲卜魚一輪白杭)忽忽過渡幾十年，人已變蒼老，勤敲清磬與紅魚，無非欲求兒孫好，我嘅丈夫

賈似道，官高一品壓當朝，神宗視之如國寶，奈何賣國以求榮，贏得臭名垂千古，死咗曾經三十年，好彩彥齡亦安居寧王府，最怕先人作孽後人當，所以長對觀音求護保(敲卜魚)

(快沖)(彥齡上介台口花下句)無端禍患從天降，嚇得我魄蕩魂無。為何要抄斬我全家二百人，又不能不信那飛騎密報。(白)乜野事元太祖會將我滿門抄斬呢，雖然呢個消息未曾証實，但係我嘅心腹從京飛來，已經對我有暗示，我亞爹賈似道係太祖嘅寵臣，點解會貽累到後人呢，我入去問吓亞媽至得(入介喝退梅香介叩頭白)孩兒叩問娘親安好

(老夫人白)彥齡，你入呢做乜野呀

(彥齡白)一來問亞媽金安，二來孩兒有的野想請教亞媽

（老夫人一才點頭白）唔，端椅，端椅

（彥齡連隨擔橈台口扶老夫人坐下，在旁躬身介）

（老夫人仄才口古）齡，做乜你今晚入呢，眉愁目苦。

（彥齡口古）亞媽，朝廷有密報，話元太祖想抄斬我一家二百餘口，我對於呢件事，有莫大疑狐。

（老夫人一才離橈口古）齡，既有密報到來，因何要把我全家誅討。

（彥齡口古）據聞係亞爹在先朝為非作惡，三郡民情鼎沸，更不佑誰人密報，所以要將我九族誅屠。

（老夫人重一才慢的的花下句）怪不得話先人作孽兒孫受，由來血債總難逃。今時法網作哀鴻，方信善

惡到頭終有報。

（彥齡叩頭悲咽白）到底我亞爹做錯乜野事呢媽

（老夫人白杭）殺身之禍在目前，盡把前塵向兒訴，你父當年殺貴妃，有女在手抱，你二妹並非我所生，

乃係貴妃遺下嘅小寶寶（介）你父媚神宗，搞到人神均憤怒，築下十二美人樓，所以宋室傾亡至

有咁早，多年叫你拆樓台，無非怕見現眼報，呢兩件事幹都好平常，有件陰功到有譜，回想三十

六年前，佢忍心降金重有官做，奉命守雁門，賣民求封誥，每逢航過嘅商船，放火焚燒不知數，

冤魂結下萬千千，做佢兒孫點會好吖（泣不成聲介）

（彥齡重一才叻叻古蹟地沉花下句）唉吔吔，唯有坐受誅屠。。

（老夫人白）齡，總算你唔會投胎，你五歲大就死咗亞爹，所以乜野事你都唔知道，我幾十歲叻冇問題，

你亦都享咗咁耐福，亞女亦好彩脫離家庭，最慘嘅就係個孫女十幾歲都拉埋去斬喎（一路喊持拐

杖卸入衣邊下介）

（彥齡重一才如夢初醒介喝白）我個女呢（一才）我個心肝呢（一才喝介）人來，人來，人來

（四梅香衣邊卸上問何事介）

（彥齡坐下喝白）大小姐去咗邊度

（梅香同白）唔知呀王爺

（快地）（娟娟上報白）王爺呀，大小姐番咗呢叻（欲下）

（彥齡一才喝白）企處（介口古）娟娟，你大小姐近來嘅行為點樣，有乜野過失，你要據情實告。

（娟娟笑介口古）王爺，你真係問得奇怪叻，係人都知道小姐又孝順，又聰明，一點過失都全無。。

（彥齡重一才頓足盟介白）噎（介）你叫大小姐番入呢（介）你地係人都躡出去

(娟娟梅香俱覺奇急足下介)

(彥齡花) 唯有怒打春蛾，迫佢離王府。(先鋒鉞埋拈籐條收於椅底，坐下魂不守舍白) 除咗打到佢自動脫離王府之外，有乜法子可以救得佢條可憐性命呢

(叻叻古，小燕與建封上入介)

(小燕熱情的埋叫白) 亞爹

(彥齡不應介)

(小燕口古) 爹呀，我帶咗亞姑姐姐番呢(一才) 佢話响屋企嘅時候，知道你平時歡喜食乜野點心，所以預先吩咐廚房整幾味你暖吓壽(一才) 爹呀，你係唔係騾我番呢遲啫，往日你一見到我，就又錫又抱。嘅叻(白) 錫吓我啦爹

(彥齡突然拈籐條亂打小燕完口古) 邊個叫你番呢呀，你歡喜去即管去，我重望你從今不再返門廬。(喝白) 扯(欲打介)

(建封先鋒鉞攔介口古) 嘩，你顛咗呀，你往日輕輕都唔捨得打下個女嘅，甚至條樹枝碰親吓個女你就連棵樹都斬埋，做乜今日你要搵皮鞭對付。(白) 你唔肉痛我都肉痛呀

(彥齡一才台口慢的的悲咽傷心跌鞭介)

(小燕悲咽白)外公，你行開，你行開啦(介口古)如果我有錯，我亞爹唔會打我嘅，或者我自己錯咗我都唔知，亞爹打我駛乜你干涉啫，亞爹生得我，打得我(介)亞爹，我有乜野錯，你即管打啦，就算我痛極都唔敢稍有哀號。。(雙手奉籐條一路跪埋介)

(建封白)有乜野錯吖，你話啦(雙)(花下句)外孫女佢身嬌肉貴，點受得起咁大煎熬。。你知否你嘅無情力，一鞭會將佢打落陰司路。(怒白)冚家劇吖，咁大力咪落去

(彥齡一才吟沉白)冚家劇(先鋒鉞在地拾鞭介大花下句)昨夜宵來得一夢，當年仇恨又上心牢。。你母水性楊花，誰不知佢係賈門淫婦。恨不能將佢鞭屍三百(一才)所以貽恨無辜。觸景傷情，鬼叫你母子一般面譜。(亂鞭介白)我打你即如打佢，如果唔想比我打嘅，你就離開我(一才)扯啦(再

打介)

(小燕慘叫白)唉吔，爹打死我叻，爹打死女你有嘅叻

(建封走埋一望肉痛介埋卷袖快白杭)你份人，真有譜，做事緣何咁有譜，十六年前事，如今至計數，我肉痛起上呢，那怕你係老虎，攞番你幾巴，咪蝦我年紀老(先鋒鉞攞彥幾巴介)

（彥齡食住先鋒鉞一踭打封躓地介）

（小燕食住跪攬彥反線中板下句）倩女半魂離，哀哀求父愛，忍不住慘切哀號。。當日你愛我似明珠，今日當我是仇人，無非是追懷亡母。相隔已十六年，往事已煙消魂渺，何必對我辣手橫操。。（花）

爹呀，你不念我膝下承歡，亦當念我順知孝道。（悲咽白）亞爹，亞媽還亞媽，我還我，就算我亞媽當年有錯（介）

（建封白）錯乜野呀，海燕當年如果有錯，你為乜事在佢自殺臨死之前，你跪响佢面前懺悔吖

（小燕白）外公，唔准你多口（介）亞爹，就算我亞媽當年係有錯，我孝順咗你咁多年，亦都彌補得番啦

爹

（彥齡悲不能忍抱起燕坐膝介乙反長二王下句）怕聽慘呼狂呼，我嘅內心痛苦，你是我心靈所寄，又點會痛錫毫無，忍淚相看，將女你重擁抱，我何只是個可憐慈父，簡直是個可憐父，你縱有娘生也屬無愛護，若不對你輕憐淺愛，你嘅幸福便全無。。你亦不信一朵慈雲，會化作噬人猛虎。（白）打親你邊處亞女

（建封搖頭白）唉，做到父女都要耍吓嘅，夠冤咯（花下句）早知肉痛又何必打，打完又錫聽費功夫。。

一場風雨咁快又天晴，兩父女坐响處講吓古。啦（欲下介）

（快沖）（娟娟上報白）王爺，第二次密報又呢叻，佢話頭一次嘅消息係真嘅咁話喎（下介）

（彥齡重一才慢慢的推燕躑地介白）我唔見得你個樣（一才）（雙句）（快點下句）今時神智又模糊。。再  
度猙獰施冷酷。（打介白）扯，我同你脫離關係

（小燕重一才沉花上句）唉吔吔，試問呢隻離巢小燕，傷心何處是家廬。。

（建封口古）外孫女，佢叫你扯，你就即管扯，呢種人只顧私仇，毫無父愛，扯啦，我帶你番去十二美人樓，你慌唔可以優悠過渡。咩，當年你亞媽都係我一手栽培佢出呢嘅，何必要向佢慘切哀號。。

（季蘭以銀盆載點心食住此介口上入介）

（彥齡喝白）扯啦嗎，我想起你亞媽，就唔認你做女

（季蘭埋笑介口古）亞哥，做乜咁怒氣呀，十六年前事已經過咗叻，何必要趕佢呢，亞小燕响廚房都有同我講，最愛嘅就係個可憐慈父。

（彥齡重一才慢慢的先鋒鉞一拳打銀盆於地介口古）你番呢做乜野呀，屋止有咁多閑米再養你呢個屎坑

姑。。

(季蘭愕然口古) 亞哥，你駛個女派帖請我番呢嘅嘢，我番呢聽日同你將生日做。吖嗎

(彥齡口古) 扯啦扯啦，十六年至番呢，梗係想向我借多少啫，錢我而家已經有用叻，比多少黃金你番去守寒廬。。啦(以金錠蘭並迫扯介)

(季蘭憤然白) 哦，原來我你都想趕扯呀，我之扯唔係比你趕嘅，我有做錯事，邊個敢趕我呀，你越要趕我，我越要响度(花下句) 你有甚權衡來趕我，誰人不識我呢個賈二姑。。估唔到一別十餘年，你變得咁無情殘酷。(白) 我係唔扯，噹噹聲嘅二姑娘，扯乜野呀

(小燕白) 爹，趕我就好叻，唔好趕姐姐，姐姐好窮架

(彥齡悲憤白) 亞蘭你番呢做乜野吖，想死咩(白杭) 不准你重入我家門(一才) 打你一巴將你數(一才) 你十七歲就會勾佬(一才) 唔嫁咪以為好有寶(一才) 我翁埋眉目當唔知(一才) 你重今日番呢想討好(一才) 從今你不是賈門人，躡番去窮街做乞婦(搵一巴趕介)

(季蘭重一才由悲咽轉狂笑頓足瘋狂下介)

(彥齡白) 衰女，你扯唔扯呀(先鋒鉞欲打介)

(小燕憤然頓足快點下句) 到今父愛已全無。。從今不返陵王府。(頓足下介)



(建封火介白) 我，你趕唔趕呀

(彥齡白) 你有關係嘅，由得你啦

(建封火介白) 你唔趕我，我都扯，唔食你嘅飯(下介)

(彥齡一才哭相思完狂哭白) 妹又趕扯咗叻，女又趕扯咗叻，本來我唔駛趕得咁辛苦，不過我唔□佢兩個

知道我就呢死而替我傷心，妹又愛我，女又愛我，而家扯咗就好叻

(內白) 聖旨到

(排子)(四手下、四刀斧手、元朝吏部尚書(狐尾)、一文官拈冊上入介)

(尚書讀白) 御旨抄斬海陵王並一家二百餘口，按冊點名後，綁赴法場

(彥齡白) 人來，人來

(四家人、四庶母，衣邊上介)

(文官作點名狀完介白) 人數已齊，尚差賈老夫人、賈二姑娘、賈大小姐

(彥齡白) 大人，我個妹已經於十六年前脫離家庭，我個女因為不守家規亦已經同佢脫離咗父女關係

(快沖)(梅香衣邊上介白) 啟稟王爺，太夫人响房裏便已經懸樑自殺

（刀斧手食住入房檢視復上介）

（彥齡絞紗哭相思完花下句）此身無掛帶，引頸待誅屠。

（尚書喝白）將他帶下

（兩刀斧手拈刀押彥齡下介）

（眾人同下介）

（落幕）

(第六場) (十二美人樓雪景) (照第二場佈小樹變大樹)

(開邊開幕) (棚頂落雪花) (琵琶獨奏)

(小燕雪樓寶子徘徊介主題曲「風雪飄搖小燕飛」小曲悲秋) 飄飄飄，晚燈耀，風淒淒我共雪飄，怕聽杜

宇泣春宵，父愛消失淚如潮(乙反長花) 不堪回首望，恨緒已難描，欲哭不成唯有笑，血淚將枯

父難饒，我好比離巢一小鳥，罡風捲劫女兒嬌，嘆一句骨肉恩情，從今斷了。(乙反南音序唱) 恨

深不能消，冷落更單調，誰照料，恨深緣淺路更遙，欲上蓬萊雪路渺(正二王下句) 留有兩行清

淚，怎能流到破曉，明朝。又不敢重扣銅門，怕被那路人，譏誚。牡丹久處温和暖，何堪今後

零落，伴殘橋。悲切切欲哭無聲，一步步回眸遠眺。(人海飄航)

X、X L X

上尺工六工六尺 尺尺

父愛終須飄渺 傷心

L X、X L

工尺、上上上合 生生五六 上乙工尺工六 工尺

都總覺無聊 我已孽緣 訂了自憐自笑 自憐

X  
、  
X

六工尺 工尺上乙上

太寂寥 堪悲愛亦渺 (反線中板下句) 回憶一對綉紅鞋，似帶有前生孽債，將我捲

愛浪，情潮。我本待輕扣柴扉，再訪情郎，曲盡荒涼，情調。怎奈燕離巢，試問更有何面目，再度投向，沈郎腰。劫後痛如灰，我欲一死投崖，又不忍負老人，常關照。願寄美人樓，獨抱琵琶終老，也勝長夜飄搖。(花) 殘燈下，撲朔迷離，只覺得寒風料峭。(徘徊介)

(建封食住此介口拈小燈衣邊上一照落樓口古) 外孫女，呢處就係十二美人樓叻，我同你預備好叻，只要你練熟番幾枝野就可以搵到錢叻，你唔駛怕呀，賣歌咋，唔係賣色笑。

(小燕口古) 外公，都係唔好叻，亞爹一生人最唔歡喜教坊，如果比佢知道重更憤火中燒。

(建封口古) 嘩，你亞爹都唔當你係女咯，你重當佢係老豆做乜吖，外孫女，呢處美人樓就係你亞媽當年出身之地，呢，呢舊石，係你亞媽時常坐嘅，呢，呢處欄杆，你亞媽亦時常憑嘅，呢，呢棵花就係你亞媽種嘅叻，想後思前，寧不令人仰天慘笑。

(小燕覽完悲咽口古) 唉，往事不堪回首記，我亞媽條命有咁苦時我亦有咁焦。。(喊介)

(建封白) 唔好喊叻(花下句) 昔日十二美人樓上草，到今日已香斷紅銷。。外孫女你重振一曲哀絃，回復當日銀燈閃耀。(白) 外孫女，等我拈盞燈照你入去睇吓啦，而家門前冷落車馬稀咯，你亞媽一離開咗就冇人支撐叻(一路講一路拉小燕下介)

(鑼邊大風雪介)

(小儀白雪樓瘋狂上介叫白) 小燕(雙)(主題曲「千古才人一例難」岐山風) 工六上工六五生五六工尺上(曲) 雪雨中飄飄，念嬌，念嬌，冒雨輕輕叫，尋覓難，訊息渺，嘆一嘆，叫一叫，今宵驚聽惡兆，此番訊息已招，心中好似被火燒，滿階冷落人亦渺，更自悲，禍災却恨難亦料(乙反中板下句) 雪雁訪春鶯，踏遍了長街陋巷，不見倩影，瀟條。。彩筆誤良緣，到此已恩怨難分，我不知是啼，還是笑。鼎沸有傳聲，王府已重門鎖閉，當年血債，未蒙饒。。欲劫燕兒還，誰知火網中人，話佢在前宵，逃去了。有夢怕成空，相思人不見(正線二王下句) 一點點淚落，如潮。。燕向那方飄，踏雪從遠眺，只見十二殘樓，掛有一燈，殘照。聽不見鳳凰簫，信是樓空鳳去，未必會午夜，藏嬌。。(南音) 識盡天涯知音少。聰明如我，本不會葬落情潮。。嗟莫是前生有約，

今生生了。驚見綉鞋復合，把前挑。。人到情狂惟慘叫。(乙反)叫一句素心人聽否(二王下句)我慘似杜宇泣紅銷。。(昭君怨)三生怨，三生夢，盡已盡已盡已一筆消，憐嬌，憐嬌，今生債，今生願，未了，未了，怎相消，難消，難消，偏偏種得種得愛情苗，愛渺人亦渺，心亦渺，花街悄悄(乙反合尺花下句)只覺得落花如夢，難以自把情療。。一天風雪更迷茫，何處覓取個隻多情小鳥。(叫白)小燕，小燕

(建封拈燈照小燕上介)

(小燕白)儀哥(先鋒鉞)

(小儀口古)小燕，我都唔知搵得你幾辛苦，你淪落响呢的地方做乜野吖，不若有情人終成眷屬，我共你係天涯飄渺。

(小燕口古)儀哥，我而家皆灰萬念叻，我亞爹都唔當我係女，所以我願在教坊終老，希望全消。。

(小儀口古)小燕你唔好怪你亞爹呀，其實你亞爹你愛到極，佢因為犯了抄斬之罪，聽朝就要綁赴刑場，佢唔想牽連你，所以會趕你，如此情深人間少。

(小燕重一才愕然白)呢個消息係唔係真架

(建封口古) 外孫女，我相信會真嘅，你亞爹平時咁錫你，點會忽然打得你咁慘辣呢，原來佢就係想救番你命仔一條。

(小燕先鋒鉞執儀白) 儀哥(花下句) 是誰個把我嚴親出賣，至今佢觸犯天條。莫非有嫁禍之人，問郎你可曾知曉。

(小儀白) 小燕，我好坦白嘅，我雖然唔係出賣你亞爹，但係你亞爹一半係由我而死(一才) 我替三郡嘅遺民揭發你先祖賈似道嘅罪行於當今元帝，點知先人犯罪後人當，會害咗今日嘅海陵王，燕(介)

我共你亞爹又無仇，又無冤，唔知點解會間接害咗佢，你唔好怪我呀，燕

(小燕先鋒鉞執儀口古) 原來我亞爹係由你而死嘅，我共你重講乜野前世孽緣吖，到如今已冤成不了。

(建封口古) 唉吔，睇唔出你呢粒靚仔咁犀利嘅，我都要同你搏埋老命一條。(先鋒鉞)

(雞啼燈光轉黎明介)

(內場嘈什聲)

(大笛水底魚)(四鄉民、四父老、四婦人湧上爭看介)

(小儀白) 燕大抵你亞爹臨刑嘅時候叻

(小燕狂白) 我要去救亞爹(雙)(先鋒鉞)

(建封白) 唔好撞埋去死呀(與小儀拉燕埋衣邊介)

(四刀斧手、手下、監斬官押彥齡上介)

(彥齡狂笑完台口乙反長花下句) 一步一回頭，傷心唯慘笑，此地何堪重泣吊，當年艷跡已難描，不見玉

人樓畔笑，只聽得枝頭燕雀，把人撩。誰人送我到刑場，只有一彎殘月照。(被刀斧手吆喝打跪

台口介)

(叻叻古)(季蘭散髮捧祭品上介口古) 亞哥，亞哥，雖然你唔當我係妹，但我亦當你係亞哥，在你臨死

之前，我都重拈的白酒黃雞來，將你來照料。(捧埋介白) 食得飽飽地至死啦哥

(彥齡一蹕打躑地口古) 你躑開，我唔識你，你重點會係我個妹，你離家十六年，不通音問，關係已全消。

(小燕狂咬建沖開台口口古) 亞爹，你嘅苦心我明白，至多唔係一齊死囉，你唔應該連女都唔要。(埋攬

介)

(彥齡一蹕打燕躑地口古) 你躑開，我唔識你，你唔係我個女，你都比我趕咗出去叻，我唔會承認你係我

膝下嬌嬈。



(季蘭悲咽白) 亞哥，你全無骨肉之情嘅，抵你咁嘅結果叻

(小燕悲咽白) 姐姐，你唔好咁鬧我亞爹呀(口古) 亞爹因為愛錫我同你，因佢早就知道抄斬預兆。

(季蘭重一才慢的的如夢初醒介口古) 哦，原來咁嘅，監斬官，請你斬埋我同小燕啦，我地應該生同埋一

齊生，死共埋一齊死，亞哥，你咁愛錫我同埋個女，唔應該等你在九泉之下咁孤單咁寂寥。。

(監斬官一才喝白) 綁

(雁兒落刀斧手將彥齡、小燕、季蘭綁在牌樓柱角)

(小儀瘋狂撲救不遂快花下句) 難於撲救，唯有跪地求饒。。(向監斬官叩頭介)

(建封花) 我惟有向父老救憐，狂呼慘叫。(向父老叩頭)

(內白) 聖駕到

(排子)(四元將、堂旦(金瓜御斧)、御扇伴元太祖忽必烈(紅面黑鬚狐尾帶劍)上介)

(太祖台口花下句) 為把民情訪探，才有駕幸海陵橋。。聞說腰斬罪臣，待孤臨場一眺。(行埋介)

(眾父老跪下呼萬歲介)

(太祖一才白) 人群裏便，有冇一個衛小儀响處

(小儀白) 蟻民就係我

(太祖口古) 衛小儀，我見你嘅聲討書，字字珠璣，好應把你嘅才華一表。想孤家愛才若渴，封你為諷諫御史，二品當朝。。

(小儀跪下乙反木魚) 我不求封耀，萬念俱消。叩頭泣血，代佢求饒。。當年賈氏毒屠遺民，佢死後冤仇便了。何以把後人腰斬在今朝。。又點可以先人作孽後人還，反會令世人譏笑。唯望聖恩如海，

莫個碧血如潮。。(叩頭白) 主上，賈太師經已死咗叻，賈太夫人亦已經自殺死咗叻，佢一家百幾口已經先一日响刑場斬咗叻，唔關海陵王事架，你赦免佢啦主上(叩頭出血介)

(父老求情介白) 赦咗海陵王啦主上

(太祖快花下句) 求憐哀懇，聲浪如潮。。傳令把犯人釋放了。

(刀斧手放彥齡、小燕、季蘭介)

(小燕跪儀介口古) 小儀哥，我都唔知點多謝你救命之恩，更唔知點樣把心情一表。

(小儀笑介口古) 燕，我共你今生再續前生約，再卜花燭良宵。。

(季蘭口古) 唉吔，姑表點可以成親架，到呢個時候我有辦法唔坦白講叻，小儀，你係我生嘅，係我當年

同衛樂師生嘅，不過為着面子計，話你係嘅啫，姑表聯婚會比人笑。

（建封口古）姑表就唔得叻，同埋血統，又點可以共赴藍橋。。

（彥齡口古）二妹，你唔係我亞媽生嘅，你係擺番呢養嘅咋，乖女你嫁比亞小儀都唔緊要。

（大祖口古）回復你舊時爵位，罪狀全消。。

（同唱煞板）笙歌重奏鳳凰簫。。

（尾聲）